

BREVES

O PXOM DE LUGO suscitou a preocupación ecoloxista. ADEGA mostrouse en desacordo coas actuacións que afectan ao río Miño, xa que o PXOM pode convertelo nun leito de auga sen maior valor natural, como xa está ocorrendo no contorno do Clube Fluvial e do recinto feiral. Por outra banda, Adega denuncia a posibel construcción de de máis de 100.000 vivendas fora da cidade, e indican que non se debe seguir o exemplo das urbanizacións permitidas en Outeiro de Rei.

INDIGNACIÓN DA FEG pola aparición de tres lobos decapitados en montes de Rodeiro, feito que a Federación Ecoloxista Galega cualificou como un acto delitivo moi grave contra a fauna salvaxe e que pon en evidencia a debilidade dos mecanismos establecidos para o fomento do respecto á fauna e medio natural en xeral.

O BALANCE ANUAL SOBRE CRECemento E EMPREGO da Comisión Europea recoñece, segundo a Oficina Europea do Ambiente (OEMA), a prioridade dunha enerxía "eficiente, segura e sustentábel", e tamén a necesidade de máis taxas e outros incentivos que promovan a sustentabilidade. A pesar disto, a Comisión non incluíu este ultimo aspecto no programa de traballo sobre enerxía que está a ser discutido nesta primavera, denunciou a OEMA.

O PARLAMENTO EUROPEO requiriu das institucións europeas unha mellora no acceso a información ambiental e nos procedementos de participación pública. A OEMA saudou esta decisión, mais queixouse pola falta de avances no acceso a xustiza en temas ambientais. Neste sentido, o Parlamento europeo rexeitou unha proposta na que se pedía a aplicación do Convenio de Aarhus no referido ao acceso á xustiza por parte das organizacións ambientalistas. +32 2 289 10 95 (EEB), info@eeb.org.

XESTIÓN CONTINUISTA DA REDE NATURA

Daniel López Vispo

PISCIFACTORÍA DE RINLO

O informe de xaneiro do 2006 sobre as medidas correctoras da declaración de impacto ambiental da piscifactoría de Rinlo emitido pola Dirección Xeral de Conservación da Natureza (DXCN) permitiulle ao Sr. Álvarez-Cascos solicitar e conseguir do Xulgado do Contencioso-Administrativo de Lugo o levantamento da paralización das obras. Mentre a Consellaría de MA promete outra sensibilidá na xestión dos espazos protexidos, o seu órgano executivo, a DXCN, mantén os mesmos criterios do goberno anterior, e cede así ás presións da Alcaldía de Ribadeo. Nada estraña cando o Subdirector Xeral e coautor do referido informe, Roxelio Fernández, xa ocupaba ese mesmo cargo no anterior goberno do PP.

Para ADEGA, a política de conservación debe pasar por manter a integridade dos Lugares de Interese Comunitario (LIC) e pola protección de todos os hábitats e especies de importancia comunitaria. Absoltos os membros de ADEGA das condenas e multas que se lle impúnhan pola súa oposición ás obras, a Asociación segue a reclamar a reubicación desta piscifactoría fora da Rede Natura.

MÁS PARQUES EÓLICOS, MENOS ESPAZOS PROTEXIDOS

A Serra do Suído é, a día de hoxe e mentres non comecen as obras dos parques eólicos de Fonteavia e Bidueiros, a última serra da dorsal galega aínda libre de infraestruturas eólicas. Conta cunha abundante representación de hábitats de interese comunitario e prioritarios, mais as presións de empresarios da pedra e da especulación eólica impediron que forme parte da Rede Natura 2000. Recentemente, a Comisión Europea instou ao Estado español a revisar a representación na Rede dalgúns dos hábitats presentes na Serra do Suído. Por isto e pola suxestión dos grupos ecoloxistas, a nova Consellaría de MM iniciou os estudos para a ampliación da Rede Natura e a inclusión da Serra do Suído nesta ampliación.

Mais na práctica pouco ten cambiado e, como na Serra do Xistral, no Courel, en Rinlo, etc, a DXCN informa que se permite calquera proxecto sempre que "a afectación aos hábitats prioritarios sexa pouco significativa". Esta foi a contestación do mencionado subdirector xeral, Rogelio Fernández, á consulta realizada

"O órgano executivo da Consellería de MA mantén os mesmos criterios do goberno anterior, xunto con algúns dos seus altos cargos"

dende a Dirección Xeral de Industria sobre a validez dunha Declaración de Impacto Ambiental realizada cando o PP estaba no goberno. Desta forma, os parques eólicos continúan a súa tramitación, medran as ameazas das canteiras, e os promotores definen cando os impactos son pouco significativos, pois encargan e pagan os Estudos de Impacto Ambiental nos que se fundamenta a Declaración.

VIADUCTO DE OUTES NA RÍA DE NOIA

Entre as obras do Plan Galicia dos gobernos de Fraga e Aznar figuraban dous viaductos sobre un espazo da Rede Natura, o Esteiro do Tambre: o viaducto de Noia cara o Porto do Son e o viaducto de Outes cara Muros foron declarados de utilidade pública polo Consello da Xunta en xuño de 2005.

A comezos de 2006, a Consellaría de Política Territorial anulou o estudio informativo e a declaración de impacto ambiental do viaducto de Noia, co obxectivo de "acadar unha mellor articulación territorial da zona afectada e a minimización do impacto ambiental". Os argumentos son igualmente válidos para o viaduto de Outes, mais o seu expediente non foi revisado pola Xunta. Unha vez máis, as presións políticas dos alcaldes están a determinar os criterios de conservación do goberno.



©Alberto SR